
Ўзбекистон туманидаги деҳқон ва фермер хўжаликлари сувни тежашнинг самарали усулларидан кенг фойдаланишмоқда

Экспертларнинг таъкидлашича, қишлоқ хўжалиги экинлари ҳосилдорлигининг пасайиши, баъзи ҳолларда эса бой берилиши сув тақчиллиги муаммоси билан ҳам боғлиқ экан. Бу вазиятни юмшатиш учун суғориш тизимида тежамкор технологияларни жорий этиш, томчиси тиллога тенг оби-ҳаётни беҳуда исроф бўлишининг олдини олиш талаб этилади.

Дунё аҳолиси сони тобора ортиб, сув захиралари камайиб бораётганлигини инобатга олинса, мавжуд ресурслардан тежаб-тергаб, самарали фойдаланиш бугунги куннинг энг долзарб вазифаларидан биридир. Қолаверса, сувни эъзоллаш, уни увол қилмаслик халқимизнинг азалий қадриятларидан биридир.

Ана шундай кўплаб жиҳатлар инобатга олиниб, Ўзбекистон туманидаги “Алиакбар Азиз файз” фермер хўжалигининг 20 гектар ғўза майдонида томчилатиб суғориш технологияси ўрнатилди.



- Юртбошимиз 5-6 июнь кунлари Фарғона вилоятига ташрифи чоғида сув тежовчи янги технологияларни ҳеч иккиланмасдан ўрнатиш даври келганлигини алоҳида таъкидладилар, - дейди фермер хўжалиги раҳбари Ҳасанбой Раҳимов. - Бу йил қарийб эллик гектар майдонга пахта экканмиз. 20 гектар майдондаги ғўзаларимизни томчилатиб суғораётганимизга ҳам бугун беш кун бўлди. Дастлабки натижалар чакки эмас.

Фермер хўжалик раҳбари томчилатиб суғоришнинг афзалликлари ҳақида сўзлар экан, “Анъанавий усулда суғорилганда ўртадан ўқариқлар қазилиши туфайли ғўза ниҳоллари нобуд бўларди. Мазкур томчилатиб суғориш технологиясидан фойдаланганда эса, ўқариқларга ҳожат қолмади. Ҳисоб-китобларга кўра, шу ҳолатда ариқлар олинмаслиги туфайли 0,50 гектар майдондаги ғўза нобуд бўлишидан сақлаб қолинди. Бундан ташқари, илгари 4 нафар сувчи бажарган ишни энди бир киши уддалаяпти”, - дея фикрини давом эттирди.

Фермер хўжалигининг жами 121 гектар ери бўлиб, 70,3 гектарида ғалла, 13,3 гектарида анор, 1,4 гектарида сабзавот экинлари экилган.

Мазкур сувни тежайдиган технологиянинг афзаллиги жуда юқори эканини тўлиқ англаб етган фермер, келгусида қолган майдонларга ҳам ушбу усулни жорий этишни режалаштирмоқда.

- Томчилатиб суғориш усули ўзининг юқори самарадорлиги, яъни сув ресурслари чекланганлик шароитида кам сув сарфлаб барқарор юқори ҳосил олиш имконини бериши билан ажралиб туради. Деҳқон ва фермер хўжаликлари учун фойда ва афзаллик томонлари жуда кўп. Хусусан, томчилатиб суғорилганлиги сабабли ер қотиб қолмайди, ерга солинадиган минерал ўғитлар эса эллик фоизга тежалади, - дейди “Томоша агро экспорт” МЧЖ раҳбари Элдоржон Сотиболдиев. - Ҳозирда Ўзбекистон туманидаги кўплаб фермер хўжаликлари худди шундай лойиҳаларни амалга ошириш мақсадида пудратчи корхонамиз билан шартномалар имзоламоқда.

Дарҳақиқат, деҳқон ва фермерларимиз томчилатиб суғоришнинг афзал жиҳатларини аллақачон англаб етганлиги боис бу усул тобора оммалашиб, нафақат интенсив боғларда, балки пахтачилик, сабзавотчилик ва полизчилик тармоқларида, шунингдек, иссиқхоналарда ҳам кенг жорий этилмоқда. Пировардида, табиий ва моддий ресурслар тежалиши билан бирга, ҳосилдорлик муттасил ошиб бормоқда. Бу эса ўз ўрнида, мамлакатимизда озиқ-овқат хавфсизлигини таъминлаш, аҳолига қишлоқ хўжалиги маҳсулотларини узлуксиз ва арзон нархларда етказиб беришга имконият яратаётгани билан янада аҳамиятлидир.

Ўзбекистон тумани ҳокимлиги Ахборот хизмати

2020-06-11 12:15:32